

Dithero tsa Tirelano mo Kutlwanong

Thero ka Sontaga wa 15 morago ga moletlo wa Borarobongwe, e le ka 02. 10. 2011 49/2011

Mo leineng la Modimo o e leng Rara le Morwa le Mowa o o Boitshepo!

1. Sefela sa 202 - 187/195
 2. **Thapelo:** Modimo Rara, Modimo Morwa, Modimo Mowa o o Boitshepo, re a go leboga, re a go baka, Modimo o o boraro mo bongwengfela, wena yo o re tlhodileng, wa re pholosa, wa re itshepisa. Morena, re phuthegetse fano kajeno mo ntlong ya gago ya kereke go utlwa Lefoko la gago. Morena, jaaka re tlile fano go utlwa Lefoko la gago, o re fe Mowa o o Boitshepo wa gago gore le rona re tlogele tsotlhe tsa rona, re go sale morago, re dumele mo go wena, re tle re goroge mo botshelong jo bo sa khutleng jo re bo baakanyeditsweng ka loso le tsogo ya ga Morwao Jesu Keresete, Mopholosi wa rona. Amen.
 3. Epistolo ka fa thulaganyong ya 2 e kwadilwe mo go 1 Petoro 5:5c-11; Efangele ka fa thulaganyong ya 1 e kwadilwe mo go Matheo 6:25-34.
 4. A go ipolelwe tumelo ya bokeresete!
 5. Sefela sa 161 - 144/147
 6. Thapelo ya mmadi wa thero.
 7. **Efangele** ka fa thulaganyong ya 3 e ntšhwa e kwadilwe mo go Luka 18:28-30, e re: "Foo Petoro a re: 'Bona, rona re tlogetse di-tsa-rona, re bile re go setse morago.' Jesu a ba raya a re: 'Ammaaruri ke lo raya ke re: Ga go ope yo o tlogetseng ntlo gongwe mosadi gongwe bana ba ga rraagwe gongwe bagolo gongwe bana, ka ntlha ya puso ya Modimo, yo o se kitlang a di amogela gantsi mo sebakeng seno, le go amogela botshelo jo bo sa khutleng mo lefatsheng le le tlang.'" Amen.
 8. **Thero:** Phuthego e e rateng ya Morena wa rona Jesu Keresete, re mo Disontageng tsa sebaka sa Trinitate, se e leng sebaka sa go boka, le go baka Modimo o o boraro mo bongwengfela, ona o e leng Rara, le Morwa, le Mowa o o Boitshepo, re o bake ka ntlha ya ditiro tse dikgolo tsa ona, tse o di re diretseng ka bopelotlhomogi jwa ona. Kajeno ke Sontaga wa lesome le botlhano morago ga moletlo wa Trinitate. Ee, phuthego, mafoko a thero ya rona ya kajeno re a bona mo Efangeleng e e kwadilweng ke Luka kwa Jesu a tswang go bua le lekawana lele la mohumi, le le neng la botsa Jesu gore le tshwanetse go dirang gore le bone boswa jwa botshelo jo bo sa khutleng. Jesu a araba lekau leo gore le tshegetse ditaolo tsa Modimo. Jesu a tshwaya ditaolo dingwe fela, a re: "O se ka wa akafala; o se ka wa bolaya; o se ka wa utswa; o se ka wa supa tshupo ya kako; tlotla rraago le mmaago." Lekawana leo la araba Jesu, la re: "Tsotlhe tse ke di tshegeditse go tloga mo bonyaneng jwa me." "Ya re Jesu a utlwa, a mo raya a re: 'O sa ntse o tlhoka selo se le sengwe fela: Rekisa tsotlhe tse o nang natso, o abele bahumanegi, mme o tla nna le lehumo kwa magodimong, o be o tle, o ntshale morago' Ya re yoo a utlwa jalo, a hutsafala segolo, ka a ne a humile thata."
- Barategi mo Moreneng, barutwa ba ga Jesu ba bona monna yoo, a boela kwa morago, a hutsafetse. Ke fa ba gopola gore le bone, fa Jesu a ne a ba bitsa, ba tlogela tsotlhe tse ba di dirileng, ba sala Jesu morago. Ka moo mo mafokong a thero ya kajeno re utlwa Petoro a gopola tseo, a re: "Bona, rona re tlogetse di-tsa-rona, re bile re go setse morago." Phuthego, Petoro o batla go itse gore bone ba tla bonang? Bone ba ba itlogetseng, ba tlogela di-tsa-bona, ba sala Jesu morago, a re: Ba tla bonang? Phuthego, Jesu a solofetsa barutwa ba gagwe tsholofetso e ntle tota, a re: "Ammaaruri ke lo raya ke re: Ga go ope yo o tlogetseng ntlo gongwe mosadi gongwe bana ba ga rraagwe gongwe bagolo gongwe bana, ka ntlha ya puso ya Modimo, yo o se kitlang a di amogela gantsi mo sebakeng seno, le go amogela botshelo jo bo sa khutleng mo lefatsheng le le tlang."
- Bomorwa-Rre, ke re: Le kajeno mo gare ga rona go sa ntse go tlhaga dipotso tse di ntseng jalo, re re: Morena, rona re tlogetse di-tsa-rona, re go sala morago. Kana, re tla bonang? Re re: Rona re badumedi go tloga mo bongwaneng jwa rona. Kana, re tla bonang? Phuthego, le rona, jaaka barutwa ba Morena Jesu, Jesu o re solofetsa tsholofetso e ntle tota ya gore re tla amogela tse dikgolo gantsi mo sebakeng seno, le go amogela botshelo jo bo sa khutleng mo lefatsheng le le tlang. Le fa go ntse jalo, a re tlhokomeleng, fa re sala Jesu morago ka boammaaruri, fa re dumela mo go ene ka boammaaruri, ga re na go gopola gore Modimo o tla re fa moputso ka ntlha ya ditiro tsa rona. Nyaya, pholoso le botshelo jo bo sa khutleng ga bo bonale ka ditiro tse re di dirileng rona, mme bo abelwa ka ntlha ya bopelonomi le bopelotlhomogi jwa Morena ka go dumela mo go Jesu Keresete fela, jaaka Paulo moapostolo a kwala a re: "Gonne lo pholositswe ka boitshwarelo ka tumelo; mme ga go tswe mo go lona, ke neo ya Modimo. Ga se ka ditiro, gore go se nne ope yo o ipokang," Baefeso 2:8-9.
- Phuthego, a le rona re tlogele tsotlhe tsa rona, tsotlhe tse re nang natso, tsotlhe tse re leng tsona, re sale Jesu morago ka boammaaruri. Jesu a bua, a re: "Fa mongwe a rata go ntshala morago, a a itlogele, a sikare sefapaano sa gagwe ka letsatsi le letsatsi, a ntshale morago," Luka 9:23. Ee, yo o salang Jesu morago ka

nnete, ga a tlhoke sepe, ga a latlhegelwe ke sepe, mme yo o ntseng jalo, o tla abelwa tse dintsi mo sebakeng seno, le mo sebakeng se se tlang botshelo jo bo sa khutleng.

Phuthego, go sala Jesu morago ke go reng? Go mo sala morago go lopang mo go rona? Go sala Jesu morago go lopa mo go rona gore yo o mo salang morago a itlogele, a be a tlogele tsotlhe tse a nang natso, a tlogele tse ene e leng tsona, a di tlogele ka ntlha ya ga Jesu, le fa e le ntlo ya gagwe, le fa e le mosadi wa gagwe, le fa e le bomorwa-rraabo, le fa e le batsadi ba gagwe, le fa e le bana ba gagwe, le fa e le eng se se kaiwang se segolo ke ene. Jesu o rialo, a re: “Yo o ratang rraagwe gongwe mmaagwe bogolo go nna, ga a ntshwanela; le yo o ratang morwawe gongwe morwadie bogolo go nna, ga a ntshwanela. Le yo o se tseyeng sefapaano sa gagwe, a ntshala morago, ga a ntshwanela. Yo o bolokang botshelo jwa gagwe o tla latlhegelwa ke jona; mme yo o latlhegelwang ke botshelo jwa gagwe ka ntlha ya me, o tla bo bona,” Matheo 10:37-39.

Moapostolo Paulo a re: “Mme tse e neng e le khumo mo go nna ke di kaile tshenyegelo ka ntlha ya ga Keresete. Ruri ke kaya dilo tsotlhe tshenyegelo ka ntlha ya kitso e kgolo ya go itse Keresete Jesu Morena wa me yo ke latlhileng dilo tsotlhe tseo ka ntlha ya gagwe; ke bile ke di kaya matlakala gore ke hume Keresete,” Bafilipi 3:7-8.

Barategi mo Moreneng, mo bofelong go tlhaga potso e e reng: A ka borona re nonofile go sala Jesu morago? Nyaya, ka borona ga re a nonofa, ka borona re batho ba ba bokoa fela, mme nonofo ya go mo sala morago re e bona mo go ene Jesu fela. Ene o tlosa mo go rona tse di re thibelang go mo sala morago sentle. Le mo thapelong re mo khubamela mo sefapaanong sa gagwe, re kopa mo go ene ka metlha, ke fa re bona nonofo eo. Go a diragala, fa re utlwa Lefoko la Modimo mo kerekeng ka Disontaga tsotlhe. Ee, nonofo eo re a e bona, fa re kopanngwa le Morena wa rona Jesu Keresete mo selalelong se se boitshepo sa gagwe, fa re ja mmele wa gagwe o re o neetsweng mo losong, fa re nwa madi a gagwe a re a tshologeletsweng mo sefapaanong gore re nne le boitshwarelo jwa dibe tsa rona.

Modimo Rraetsho yo o mo legodimong, a a re thuse rotlhe, ba re sa ntseng re utlwa Lefoko la gagwe gore a re fe Mowa o o Boitshepo wa gagwe, re tle re kgone go tlogela tsotlhe tsa rona, bogolo re tlogele bokanyo jwa go ikanya tse re leng tsona, le tse re di dirang rona, gore re ikanye Jesu, fa a re baakanyeditse pholoso le botshelo jo bo sa khutleng ka go re itshwarela thata maleo otlhe a rona ka malatsi otlhe, re sale Jesu morago, re dumele mo go ene ka boammaaruri, re khutle ka go amogelwa ke ene, le go abelwa ke ene tse dintsi mo sebakeng seno, le mo sebakeng se se tlang botshelo jo bo sa khutleng mo legodimong. A Modimo o re fe tse tsotlhe tseo ka bopelotlhomogi jwa ona. Amen.

9. **Thapelo:** Morena, Modimo, Rara wa rona yo o mo legodimong, re a leboga, re lebogela Lefoko le le boitshepo la gago le re tswang go le utlwa ke gona jaanong. Tsoseletsa dipelo tsa rona ka lona gore re le rate, re le dire, re tshale ka fa le buang ka teng. Morena, o re fe gore le rona re utlwe ka metlha Lefoko la gago le o re bitsang ka lona, re tle re sikare sefapaano sa rona ka metlha, re sale Jesu morago, re tle re fiwe ke wena kabelo e kgolo e e tswang mo go wena, e e leng botshelo jo bo sa khutleng mo legodimong ka ene Jesu Keresete, Morwao yo o rategang, Morena le Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 186 - 172/179

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 1999
Kgatiso le go rongwa ga dithero tseo go tshagediwa ke kopano e e bidiwang The Lutheran Heritage Foundation.